

I. DISPOSICIÓNS XERAIS

MINISTERIO DA PRESIDENCIA, RELACIÓNS COAS CORTES E MEMORIA DEMOCRÁTICA

10823 *Real decreto 471/2021, do 29 de xuño, polo que se establecen os limiares de renda e patrimonio familiar e as contías das bolsas e axudas ao estudo para o curso 2021/22, e se modifica parcialmente o Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas.*

O cumprimento do deber constitucional de garantir a igualdade no acceso á educación require a remoción de calquera obstáculo de natureza socioeconómica que dificulte ou impida o exercicio deste dereito fundamental. Máis aló da educación básica, as prestacións educativas perden as notas de obrigatoriedade e gratuidade, pero a garantía constitucional do dereito á educación exige que ninguén quede excluído do acceso e permanencia no ensino de niveis que non sexan obrigatorios ou gratuítos por razóns socioeconómicas, para o cal é preciso establecer mecanismos de exención de taxas e prezos públicos ou de compensación destes gastos a través de bolsas e axudas ao estudo. Deste modo, pode inferirse que o Constituínte fixou a obrigación dos poderes públicos de establecer un sistema de bolsas e axudas para garantir o dereito de todos á educación.

Neste sentido, o lexislador abordou estes aspectos, en cumprimento da súa responsabilidade contida no artigo 81.1 da Constitución («desenvolvemento dos dereitos fundamentais e das liberdades públicas»), no artigo 6.3.h) da Lei orgánica 8/1985, do 3 de xullo, reguladora do dereito á educación, no artigo 45 da Lei orgánica 6/2001, do 21 de decembro, de universidades, e no artigo 83 da Lei orgánica 2/2006, do 3 de maio, de educación, na nova redacción dada pola Lei orgánica 3/2020, do 29 de decembro. A través destas disposicións conformáronse as bolsas e axudas no ensino postobrigatorio como un elemento esencial do dereito á educación.

Por outra parte, a disposición adicional novena da Lei 24/2005, do 18 de novembro, de reformas para o impulso da produtividade, estableceu a concesión directa ao alumnado de estudos regrados do sistema educativo, tanto universitarios como non universitarios, das bolsas e axudas ao estudo que se convoquen, con cargo aos orzamentos do Ministerio de Educación, para as cales non se fixe un número determinado de persoas beneficiarias.

Pola súa vez, o Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas, determina os elementos estruturais básicos do sistema: as modalidades das bolsas, as condicións académicas e económicas, os supostos de incompatibilidade, revogación e reintegro, e cantos requisitos, condicións socioeconómicas ou outros factores sexan precisos para asegurar a igualdade no acceso á educación.

Esta última norma difire a un real decreto anual a determinación de dous parámetros cuantitativos que, polo seu carácter conxuntural, non poden establecerse con carácter xeral: os limiares de renda e patrimonio cuxa superación determina a perda do dereito á obtención da bolsa ou axuda, e o importe dos diferentes compoñentes e contías das bolsas e axudas ao estudo. Por isto, este marco xurídico complétase con este real decreto que establece, para o curso académico 2021/22, as contías das bolsas e axudas ao estudo dos ministerios de Educación e Formación Profesional e de Universidades, así como os limiares de patrimonio e renda familiar que operan como límite para a obtención de bolsas e axudas ao estudo.

Debe sinalarse que ambos os ministerios, de acordo coa disposición adicional sexta do Real decreto 431/2020, do 3 de marzo, polo que se desenvolve a estrutura orgánica básica do Ministerio de Universidades, adoptan, de maneira conxunta e a través dos mecanismos organizativos que se articulen, as decisións sobre o deseño, a planificación e

a dirección da política de bolsas e axudas ao estudo. Pola súa parte, o Real decreto 498/2020, do 28 de abril, que aproba a estrutura orgánica básica do Ministerio de Educación e Formación Profesional, atribúe, no seu artigo 2.1.e), á Secretaría de Estado de Educación a competencia para deseñar, planificar e dirixir a política de bolsas e axudas ao estudo, en coordinación co Ministerio de Universidades, así como a súa xestión.

O Goberno, desde o momento da súa constitución, asumiu un compromiso firme coa dimensión social da educación e co impulso dunha política de bolsas e axudas ao estudo que garanta que ningún estudante abandone os seus estudos postobrigatorios por motivos económicos, co cal asegura a cohesión social e a igualdade de oportunidades. Neste sentido, o Goberno xa anunciou o seu propósito de reformar en profundidade o actual sistema de bolsas e axudas ao estudo. No pasado curso 2020/21 implementáronse xa algunhas medidas de reforma do modelo, consistentes na redución dos requisitos académicos, a elevación do limiar 1 de renda familiar até case equiparalo co limiar da pobreza, o incremento en 100 euros de determinadas contías, e algunhas melloras dirixidas aos colectivos de estudantes con necesidade específica de apoio educativo, como a inclusión, na convocatoria de axudas para o alumnado con necesidade específica de apoio educativo, dunha parte do alumnado con trastorno do espectro autista que, até agora, non tiña acceso a estas axudas. Ademais, incluíronse outras modificacións como a elevación até os vinte e tres anos da idade dos fillos e fillas de vítimas de violencia de xénero para accederen ás bolsas e axudas ao estudo con maior flexibilidade nos requisitos académicos requiridos con carácter xeral.

Para o curso 2021/22, increméntase de novo o financiamento das bolsas con cargo aos orzamentos xerais do Estado. En efecto, o orzamento de 2021 recolle un incremento de 128 millóns de euros na dotación do programa «Bolsas e axudas a estudantes», que permiten seguir abordando novas medidas no proceso de reforma do modelo. Así, completando a redución nas notas exixibles para a obtención de bolsa nos estudos de grao que se recolleu o curso pasado, esténdese agora esa redución da cualificación requirida nos estudos conducentes á obtención dos denominados másters habilitantes. Por outra parte, increméntase a contía da bolsa básica para o alumnado de ciclos formativos de grao básico e incorpórase o alumnado con trastorno grave de comunicación e da linguaxe como posibles beneficiarias e beneficiarios das axudas para o alumnado con necesidade específica de apoio educativo, de acordo co artigo 73 da Lei orgánica 2/2006, do 3 de maio, de educación, na nova redacción dada pola Lei orgánica 3/2020, do 29 de decembro.

E, para o futuro curso 2022/23, está prevista a revisión dos calendarios e prazos de presentación de solicitudes e das fases do proceso de xestión das bolsas de maneira que a gran maioría das persoas solicitantes poidan coñecer, antes do comezo do curso escolar, se van resultar elixibles para a obtención de bolsa.

Este real decreto axústase aos principios de boa regulación contidos na Lei 39/2015, do 1 de outubro, do procedemento administrativo común das administracións públicas. Así, en canto ao principio de necesidade, xustifícase no mandato para o desenvolvemento regulamentario polo Goberno, contido na disposición adicional novena da Lei 24/2005, do 18 de novembro, de reformas para o impulso da produtividade, así como na disposición adicional primeira do Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas que encomenda ao Goberno a aprobación anual dun real decreto en que se especifiquen os parámetros económicos que deben rexer a concesión de bolsas en cada curso académico. No que concirne aos principios de proporcionalidade, seguridade xurídica, eficacia e eficiencia, consegue o seu obxectivo mediante a única alternativa posible, que é a aprobación dunha norma con rango de real decreto; é coherente co resto do ordenamento xurídico, non impón cargas administrativas innecesarias ou accesorias e racionaliza, na súa aplicación, a xestión dos recursos públicos. Finalmente, cumpre o principio de transparencia dado que, de conformidade co previsto no artigo 26, números 2 e 6, da Lei 50/1997, do 27 de novembro, do Goberno, este real decreto se someteu aos trámites de consulta pública previa e de audiencia e información pública mediante a súa publicación no portal web do Ministerio de

Educación e Formación Profesional. O dito principio refórzase con este preámbulo e a correspondente memoria de análise de impacto normativo, que explican suficientemente o seu contido e obxectivos.

Desde o punto de vista do seu procedemento de elaboración, o real decreto foi obxecto de ditame do Consello Escolar do Estado, do Consello Nacional da Discapacidade e de informe do Consello de Universidades e do Consello de Estudiantes Universitarios do Estado, e na súa tramitación foron consultados tanto o Observatorio Universitario de Bolsas, Axudas ao Estudo e Rendemento Académico como as comunidades autónomas a través da Conferencia de Educación e da Conferencia Xeral de Política Universitaria. Así mesmo, someteuse a consulta e información pública, recibiu informe do Ministerio de Política Territorial e Función Pública e conta con informe favorable do Ministerio de Facenda.

Este real decreto dítase ao abeiro do artigo 149.1.30.^a da Constitución española, que reserva ao Estado a competencia para ditar as normas básicas para o desenvolvemento do artigo 27 da Constitución.

Na súa virtude, por proposta da ministra de Educación e Formación Profesional e do ministro de Universidades, de acordo co Consello de Estado, e logo de deliberación do Consello de Ministros na súa reunión do día 29 de xuño de 2021,

DISPOÑO:

CAPÍTULO I

Disposicións xerais

Artigo 1. *Obxecto.*

Este real decreto ten por obxecto determinar os parámetros cuantitativos polos cales se rexerán as convocatorias de bolsas e axudas ao estudo correspondentes ao curso académico 2021/22, financiadas con cargo ao orzamento do Ministerio de Educación e Formación Profesional:

- a) A contía das diferentes modalidades das bolsas e axudas ao estudo reguladas no Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas.
- b) Os limiares de renda e patrimonio familiar por riba dos cales desaparece o dereito á percepción das bolsas e axudas ao estudo.

Artigo 2. *Ámbito de aplicación.*

Para o curso académico 2021/22, e con cargo aos créditos correspondentes dos orzamentos xerais do Estado, realizaranse as seguintes convocatorias de bolsas e axudas ao estudo, sen número determinado de persoas beneficiarias:

1. Convocatoria de bolsas e axudas ao estudo de carácter xeral, dirixidas ás seguintes ensinanzas:

- a) Bacharelato.
- b) Formación profesional de grao medio e de grao superior, incluídos os estudos de formación profesional realizados nos centros docentes militares.
- c) Ensinanzas artísticas profesionais.
- d) Ensinanzas deportivas.
- e) Ensinanzas artísticas superiores.
- f) Estudos relixiosos superiores.
- g) Ensinanzas de idiomas realizadas en escolas oficiais de titularidade das administracións educativas, incluída a modalidade a distancia.

h) Cursos de acceso e cursos de preparación para as probas de acceso á formación profesional e cursos de formación específicos para o acceso aos ciclos formativos de grao medio e de grao superior impartidos en centros públicos e en centros privados concertados que teñan autorizadas ensinanzas de formación profesional.

i) Ciclos formativos de grao básico.

j) Ensinanzas universitarias conducentes a títulos oficiais de grao e de máster, incluídos os estudos de grao e máster cursados nos centros universitarios da Defensa e da Garda Civil.

k) Curso de preparación para o acceso á universidade de maiores de vinte e cinco anos, impartido por universidades públicas.

l) Créditos complementarios ou complementos de formación necesarios para o acceso ou obtención do máster e do grao.

2. Convocatoria de axudas ao estudo para estudantes con necesidade específica de apoio educativo.

CAPÍTULO II

Bolsas e axudas ao estudo de carácter xeral

Artigo 3. *Contías das bolsas e axudas ao estudo de carácter xeral para as ensinanzas a que se refiren as letras a) a i) do artigo 2.1.*

1. As contías das bolsas e axudas ao estudo de carácter xeral para as ensinanzas indicadas nas letras a) a i) do artigo 2.1 que se poderán percibir nos supostos previstos neste real decreto serán as seguintes:

a) Contía fixa ligada á renda do solicitante: 1.700 euros.

b) Contía fixa ligada á residencia do solicitante durante o curso: 1.600 euros. Non obstante, en ningún caso a dita contía poderá superar o custo real da prestación.

c) Bolsa básica: 300 euros. No caso de cursar ciclos formativos de grao básico, esta contía será de 350 euros.

d) Contía fixa ligada á excelencia no rendemento académico: entre 50 e 125 euros coa seguinte distribución:

Nota media da persoa solicitante	Contía en euros
Entre 8,00 e 8,49 puntos.	50
Entre 8,50 e 8,99 puntos.	75
Entre 9,00 e 9,49 puntos.	100
9,50 puntos ou máis.	125

e) Contía variable: o seu importe mínimo será de 60 euros.

2. Aqueles que cursen en modalidade presencial e matrícula completa os estudos enumerados nas letras a), b), c), d), e) e f) do artigo 2.1 poderán percibir, segundo o seu limiar de renda recollido no parágrafo seguinte, as contías fixas, incluída a bolsa básica, e a contía variable. Para a adxudicación da contía ligada á residencia requirirase que a persoa solicitante curse estudos presenciais cun número mínimo de horas lectivas que se determinarán en cada convocatoria e que acredite a necesidade de residir fóra do domicilio familiar durante o curso, por razón da distancia entre este e o centro docente, os medios de comunicación existentes e os horarios lectivos. Para estes efectos, considerarase como domicilio familiar o máis próximo ao centro docente de que sexa titular ou no cal resida de forma habitual algún membro computable da unidade familiar, aínda que non coincida co domicilio legal da persoa solicitante.

Os limiares de renda aplicables para a concesión das contías das bolsas previstas neste punto serán os seguintes:

1.º) Limiar 1: aqueles que, pola súa renda, non superen o limiar 1 de renda familiar establecido neste real decreto poderán obter as contías a que se refiren as letras a), b), d) e e) do número 1.

2.º) Limiar 2: aqueles que, pola súa renda, superen o limiar 1 e non superen o limiar 2 de renda familiar establecido neste real decreto poderán obter as contías a que se refiren as letras b), c), d) e e) do número 1.

3.º) Limiar 3: aqueles que, pola súa renda, superen o limiar 2 e non superen o limiar 3 de renda familiar establecido neste real decreto poderán obter a contía fixa ligada á excelencia no rendemento académico e a bolsa básica.

3. Aqueles que cursen en modalidade distinta da presencial e matrícula completa os estudos enumerados no número 2 anterior poderán percibir, segundo o seu limiar de renda recollido no parágrafo seguinte, a contía fixa ligada á excelencia no rendemento académico, a bolsa básica e a contía variable mínima.

Os limiares de renda aplicables para a concesión das contías das bolsas previstas neste punto serán os seguintes:

1.º) Limiar 2: aqueles que, pola súa renda, non superen o limiar 2 de renda familiar establecido neste real decreto poderán obter a contía fixa ligada á excelencia no rendemento académico, a bolsa básica e a contía variable mínima.

2.º) Limiar 3: aqueles que, pola súa renda, superen o limiar 2 e non superen o limiar 3 de renda familiar establecido neste real decreto poderán obter a contía fixa ligada á excelencia no rendemento académico e a bolsa básica.

4. Aqueles que cursen os estudos enumerados nas letras g), h) e i) do artigo 2.1, así como aqueles que realicen o proxecto de fin de estudos ou opten por matrícula parcial, poderán percibir, segundo o seu limiar de renda recollido no parágrafo seguinte, a bolsa básica e a contía variable mínima.

Os limiares de renda aplicables para a concesión das contías das bolsas previstas neste punto serán os seguintes:

1.º) Limiar 2: aqueles que, pola súa renda, non superen o limiar 2 de renda familiar establecido neste real decreto poderán obter a bolsa básica e a contía variable mínima.

2.º) Limiar 3: aqueles que, pola súa renda, superen o limiar 2 e non superen o limiar 3 de renda familiar establecido neste real decreto poderán obter unicamente a bolsa básica.

Artigo 4. *Contías das bolsas e axudas ao estudo de carácter xeral para as ensinanzas a que se refiren as letras j), k) e l) do artigo 2.1.*

1. As contías das bolsas de carácter xeral para as ensinanzas indicadas nas letras j) a l) do artigo 2.1 que se poderán percibir nos supostos previstos neste real decreto serán as seguintes:

a) Contía fixa ligada á renda do solicitante: 1.700 euros.

b) Contía fixa ligada á residencia do solicitante durante o curso: 1.600 euros. Non obstante, a dita contía non poderá superar o custo real da prestación. En todo caso, para a súa adxudicación requirirase que a persoa solicitante curse estudos en modalidade presencial e acredite a necesidade de residir fóra do domicilio familiar durante o curso, por razón da distancia entre este e o centro docente, os medios de comunicación existentes e os horarios lectivos. Para estes efectos, considerarase como domicilio familiar o máis próximo ao centro docente que pertenza ou no cal resida de forma habitual algún membro computable da unidade familiar, aínda que non coincida co domicilio legal da persoa solicitante.

c) Contía fixa ligada á excelencia no rendemento académico: entre 50 e 125 euros coa seguinte distribución:

Nota media da persoa solicitante	Contía en euros
Entre 8,00 e 8,49 puntos.	50
Entre 8,50 e 8,99 puntos.	75
Entre 9,00 e 9,49 puntos.	100
9,50 puntos ou máis.	125

Para estes exclusivos efectos, á cualificación que se terá en conta no caso daqueles que estean matriculados en segundos e posteriores cursos universitarios aplicaráselle un coeficiente corrector de 1,17 para os estudos da área de arquitectura e enxeñaría, de 1,11 para os estudos da área de ciencias e de 1,05 para os estudos da área de ciencias da saúde.

d) Contía variable: o seu importe mínimo será de 60 euros.

e) Bolsa de matrícula: comprenderá o prezo público oficial dos servizos académicos universitarios correspondente aos créditos en que se matriculase o ou a estudante por primeira vez no curso 2021/22.

Non formarán parte da bolsa de matrícula aqueles créditos que excedan o mínimo necesario para obter a titulación de que se trate.

No caso daqueles que estuden en universidades privadas e en centros docentes adscritos a universidades públicas e privadas que non apliquen os prezos públicos oficiais aprobados pola comunidade autónoma, a contía desta bolsa de matrícula será igual ao prezo mínimo establecido pola comunidade autónoma para un estudo co mesmo contido experimental nunha universidade pública desa mesma comunidade autónoma.

A compensación ás universidades das contías da bolsa de matrícula a que se refiren os parágrafos anteriores efectuarase conforme o previsto na disposición adicional cuarta.

2. Aqueles que cursen os estudos enumerados na letra j) do artigo 2.1 con matrícula completa poderán percibir, segundo o seu limiar de renda recollido no parágrafo seguinte, as contías fixas, a contía variable e a bolsa de matrícula. Para a adxudicación da contía ligada á renda e da contía ligada á residencia requirirase que, durante o curso, a persoa solicitante curse estudos na modalidade presencial.

Os limiares de renda aplicables para a concesión das contías das bolsas previstas neste punto serán os seguintes:

1.º) Limiar 1: aqueles que, pola súa renda, non superen o limiar 1 de renda familiar establecido neste real decreto poderán obter as contías a que se refiren as letras a), b), c), d) e e) do número 1.

2.º) Limiar 2: aqueles que, pola súa renda, superen o limiar 1 e non superen o limiar 2 de renda familiar establecido neste real decreto poderán obter as contías a que se refiren as letras b), c), d) e e) do número 1.

3.º) Limiar 3: aqueles que, pola súa renda, superen o limiar 2 e non superen o limiar 3 de renda familiar establecido neste real decreto poderán obter a contía fixa ligada á excelencia no rendemento académico e a bolsa de matrícula.

3. Aqueles que realicen o curso de preparación para o acceso á universidade de maiores de vinte e cinco anos impartido por universidades públicas, aqueles que cursen complementos de formación ou unicamente realicen o traballo de fin de grao ou máster, así como aqueles que opten por matrícula parcial, poderán obter, segundo o seu limiar de renda recollido no parágrafo seguinte, a bolsa de matrícula e a contía variable mínima.

Os limiares de renda aplicables para a concesión das contías das bolsas previstas neste punto serán os seguintes:

- 1.º) Limiar 2: aqueles que, pola súa renda, non superen o limiar 2 de renda familiar establecido neste real decreto poderán obter a bolsa de matrícula e a contía variable mínima.
- 2.º) Limiar 3: aqueles que, pola súa renda, superen o limiar 2 e non superen o limiar 3 de renda familiar establecido neste real decreto poderán obter unicamente a bolsa de matrícula.

Artigo 5. *Contía variable.*

1. Os recursos asignados polo Ministerio de Educación e Formación Profesional para a convocatoria do curso escolar 2021/22 de bolsas e axudas ao estudo de carácter xeral, coa excepción daqueles que se destinen a compensar as bolsas de matrícula, aplicaranse en primeiro lugar á cobertura das bolsas básicas e das contías fixas ligadas á renda, á residencia e á excelencia no rendemento académico da persoa solicitante, segundo o indicado nos artigos 3 e 4, das contías adicionais previstas no artigo 6 e na disposición adicional primeira, e da contía variable mínima a que se refiren os artigos 3.3, 3.4 e 4.3 deste real decreto, así como os artigos 12, 18.1, 19.1, 20.1, 22.2, 26 e a disposición transitoria primeira do Real decreto 1721/2007, do 21 de decembro.

2. O importe que, se for o caso, reste tras realizar as operacións indicadas no número anterior, dependendo das dispoñibilidades orzamentarias, asignarase á cobertura da contía variable, que se distribuirá entre as persoas solicitantes en función da súa renda familiar e do seu rendemento académico, mediante a aplicación da fórmula establecida no artigo 9.2 do Real decreto 1721/2007, do 21 de decembro. Os ministerios de Educación e Formación Profesional e de Universidades determinarán de forma conxunta a porcentaxe do dito importe que se destinará á contía variable que corresponda, por unha parte, ao estudantado universitario, de ensinanzas artísticas superiores e de estudos relixiosos superiores e, por outra, ao resto do alumnado non universitario.

Para a concesión da contía variable, a renda do solicitante non poderá superar o limiar 2 de renda familiar establecido neste real decreto.

3. O importe reservado para compensar as bolsas de matrícula aboarase unha vez que se reciba no Ministerio de Educación e Formación Profesional a información das universidades sobre prezos públicos devindicados por aqueles que obtivesen a bolsa de matrícula, sen prexuízo da posibilidade de realizar pagamentos á conta ás universidades.

Artigo 6. *Contías adicionais.*

1. O importe que resulte da concesión das bolsas e axudas ao estudo establecidas nos artigos 3 e 4 deste real decreto incrementarase nunha das seguintes contías adicionais, conforme as normas legais mediante as cales se dá cumprimento ao mandato contido no artigo 138.1 da Constitución:

a) As persoas beneficiarias de bolsas e axudas ao estudo con domicilio familiar na España insular ou en Ceuta ou Melilla que se vexan na necesidade de utilizar transporte marítimo ou aéreo para acceder ao centro docente en que cursen os seus estudos desde o seu domicilio disporán de 442 euros máis sobre a contía das bolsas e axudas ao estudo que lles correspondesen.

b) Esta cantidade adicional será de 623 euros para quen teña domicilio familiar nas illas de Lanzarote, Fuerteventura, La Gomera, El Hierro e La Palma, Menorca, Ibiza e Formentera.

c) No caso de que a persoa beneficiaria teña que desprazarse entre as illas Baleares ou as illas Canarias e a Península Ibérica, as cantidades a que se refiren as letras a) e b) anteriores serán de 888 e 937 euros, respectivamente.

2. As contías adicionais indicadas no número anterior serán tamén aplicables a aqueles que estean matriculados en centros universitarios de educación a distancia ou centros oficiais de bacharelato a distancia, que residan en territorio insular que careza de centro asociado ou colaborador.

CAPÍTULO III

Axudas ao estudo e subsidios para o alumnado con necesidade específica de apoio educativo**Artigo 7.** *Estudos comprendidos, contías e limiar de renda.*

1. Convocaranse axudas ao estudo e subsidios para o alumnado que curse estudos nos niveis de segundo ciclo de educación infantil, educación primaria, educación secundaria obrigatoria, bacharelato, ciclos formativos de grao medio e de grao superior, ciclos formativos de grao básico, así como os outros programas formativos de formación profesional a que se refire a disposición adicional cuarta do Real decreto 127/2014, do 28 de febreiro, e que corresponda a calquera das seguintes tipoloxías:

- a) Alumnado con necesidade específica de apoio educativo derivada de discapacidade ou trastorno grave de conduta.
- b) Alumnado con trastorno grave da comunicación e da linguaxe asociado a necesidades educativas especiais.
- c) Alumnado con necesidade específica de apoio educativo asociada a trastorno de espectro do autismo.
- d) Alumnado con necesidade específica de apoio educativo asociada a alta capacidade intelectual.

2. Os subsidios atenderán tanto aos gastos de comedor escolar como aos de transporte escolar e concederanse ao alumnado con necesidades educativas especiais que pertenza a familias numerosas. Para a concesión dos subsidios non se atenderá á renda nin ao patrimonio familiar.

3. Os compoñentes e as contías das axudas e subsidios para o alumnado a que se refiren as letras a), b) e c) do número 1 anterior serán os seguintes:

Compoñentes	Educación primaria, ESO e ciclos formativos de grao básico	Resto de niveis educativos
	Contías (euros)	
Axuda de ensino.	Até 862	Até 862
Axuda ou subsidio de transporte escolar.	Até 617	Até 617
Axuda ou subsidio de comedor escolar.	Até 574	Até 574
Axuda de residencia escolar.	Até 1.795	Até 1.795
Axuda para transporte de fin de semana.	Até 442	Até 442
Axuda para transporte urbano.	Até 308	Até 308
Axuda para material escolar.	Até 105	Até 204
Axuda para reeducación pedagóxica.	Até 913	Até 913
Axuda para reeducación da linguaxe.	Até 913	Até 913

As contías establecidas na táboa anterior para as axudas ou subsidios de transporte incrementaranse até nun 50 por cento cando o alumnado presente unha discapacidade motora recoñecida superior ao 65 por cento.

Non se concederán axudas nin subsidios cando os gastos a que atenden estean cubertos suficientemente por servizos ou fondos públicos ou, se for o caso, por axudas concedidas aos centros para financiaren o correspondente servizo. No nivel de educación infantil non se concederán axudas para material escolar.

4. O alumnado con altas capacidades intelectuais poderá obter, nos termos previstos no artigo 11 do Real decreto 1721/2007, do 21 de decembro, unha axuda de até 913 euros

para o pagamento dos gastos derivados da inscrición e asistencia a programas específicos para este colectivo.

5. O limiar de renda aplicable para a concesión dos compoñentes das axudas ao estudo para o alumnado con necesidade específica de apoio educativo será o seguinte:

Número de membros da familia	Limiar (euros)
Familias dun membro.	11.937
Familias de dous membros.	19.444
Familias de tres membros.	25.534
Familias de catro membros.	30.287
Familias de cinco membros.	34.370
Familias de seis membros.	38.313
Familias de sete membros.	42.041
Familias de oito membros.	45.744

A partir do oitavo membro engadiranse 3.672 euros por cada novo membro computable da familia.

CAPÍTULO IV

Limiares de renda e patrimonio familiar

Artigo 8. *Limiares de renda familiar.*

1. De conformidade co previsto na letra e) da disposición adicional primeira do Real decreto 1721/2007, do 21 de decembro, o limiar 1 de renda familiar para o curso 2021/22 fixarase nas convocatorias que aproben o Ministerio de Educación e Formación Profesional e as administracións educativas competentes que asumisen o pleno exercicio das competencias previstas no dito real decreto.

O Ministerio de Educación e Formación Profesional financiará as bolsas suxeitas ao extremo inferior do intervalo recollido na seguinte táboa, incluído o compoñente da bolsa de matrícula nos termos establecidos na disposición adicional cuarta. As bolsas que se concedan aos e ás estudantes cuxa renda familiar se sitúe dentro do intervalo fixado financiaranse ao cincuenta por cento entre o Ministerio de Educación e Formación Profesional e a comunidade autónoma convocante:

Número de membros da familia	Intervalo (euros)
Familias dun membro.	Entre 8.422 e 8.871
Familias de dous membros.	Entre 12.632 e 13.306
Familias de tres membros.	Entre 16.843 e 17.742
Familias de catro membros.	Entre 21.054 e 22.177
Familias de cinco membros.	Entre 24.423 e 25.726
Familias de seis membros.	Entre 27.791 e 29.274
Familias de sete membros.	Entre 31.160 e 32.822
Familias de oito membros.	Entre 34.529 e 36.371

A partir do oitavo membro engadiranse entre 3.368 e 3.548 euros por cada novo membro computable da familia.

2. O limiar 2 de renda familiar para o curso 2021/22 será o recollido na seguinte táboa:

Número de membros da familia	Limiar (euros)
Familias dun membro.	13.236
Familias de dous membros.	22.594
Familias de tres membros.	30.668
Familias de catro membros.	36.421
Familias de cinco membros.	40.708
Familias de seis membros.	43.945
Familias de sete membros.	47.146
Familias de oito membros.	50.333

A partir do oitavo membro engadiranse 3.181 euros por cada novo membro computable da familia.

3. De conformidade co previsto na letra e) da disposición adicional primeira do Real decreto 1721/2007, do 21 de decembro, o limiar 3 de renda familiar para o curso 2021/22 fixarase nas convocatorias que aproben o Ministerio de Educación e Formación Profesional e as administracións educativas competentes que asumisen o pleno exercicio das competencias previstas no dito real decreto.

O Ministerio de Educación e Formación Profesional financiará as bolsas suxeitas ao extremo inferior do intervalo recollido na seguinte táboa, incluído o compoñente da bolsa de matrícula nos termos establecidos na disposición adicional cuarta. As bolsas que se concedan a estudantes cuxa renda familiar se sitúe dentro do intervalo fixado financiaranse ao cincuenta por cento entre o Ministerio de Educación e Formación Profesional e a comunidade autónoma convocante:

Número de membros da familia	Intervalo (euros)
Familias dun membro.	Entre 14.112 e 14.826
Familias de dous membros.	Entre 24.089 e 25.308
Familias de tres membros.	Entre 32.697 e 34.352
Familias de catro membros.	Entre 38.831 e 40.796
Familias de cinco membros.	Entre 43.402 e 45.598
Familias de seis membros.	Entre 46.853 e 49.224
Familias de sete membros.	Entre 50.267 e 52.810
Familias de oito membros.	Entre 53.665 e 56.380

A partir do oitavo membro engadiranse entre 3.391 e 3.562 euros por cada novo membro computable da familia.

Artigo 9. *Cálculo da renda familiar.*

1. A renda familiar, para efectos de bolsa ou axuda, obterase por agregación das rendas de cada un dos membros computables da familia que obteña ingresos de calquera natureza, calculadas segundo se indica nos números seguintes e de conformidade coa

normativa reguladora do imposto sobre a renda das persoas físicas aplicable. Para efectos das bolsas e axudas ao estudo do curso 2021/22, computarase o exercicio 2020.

2. Para a determinación da renda dos membros computables que presentasen declaración polo imposto sobre a renda das persoas físicas, procederáse do modo seguinte:

a) Sumarase a base imponible xeral coa base imponible do aforro, excluindo todos os saldos netos negativos de ganancias e perdas patrimoniais de 2016 a 2019 e o saldo neto negativo de rendementos do capital mobiliario de 2016 a 2019 a integrar na base imponible do aforro.

b) Deste resultado restarase a cota resultante da autoliquidación.

3. Para a determinación da renda dos demais membros computables que obteñan ingresos propios e non presentasen declaración polo imposto sobre a renda das persoas físicas, seguirase o procedemento descrito na letra a) do número 2 e, do resultado obtido, restaranse os pagamentos á conta efectuados.

Artigo 10. *Deducións da renda familiar.*

No curso 2021/22 aplicaranse as seguintes deducións da renda familiar:

a) O 50 por cento dos ingresos achegados por calquera membro computable da familia distinto dos sustentadores principais.

b) 525 euros por cada unha das irmás e dos irmáns que sexa membro computable e conviva no domicilio familiar, incluída a persoa solicitante, cando se trate de familias numerosas de categoría xeral, e 800 euros se se trata de familias numerosas de categoría especial, sempre que se teña dereito a este beneficio. Cando a persoa solicitante sexa a titular da familia numerosa, as cantidades sinaladas serán computadas en relación con cada un dos fillos e fillas que a compoñan. Esta dedución será de até 2.000 euros na convocatoria de axudas para alumnado con necesidade específica de apoio educativo.

c) 1.811 euros por cada unha das irmás e dos irmáns, ou por cada unha das fillas e dos fillos da persoa solicitante ou a propia persoa solicitante que presente discapacidade, legalmente recoñecida, de grao igual ou superior ao 33 por cento; ou 2.881 euros cando a discapacidade sexa de grao igual ou superior ao 65 por cento. Esta dedución será de 4.000 euros pola persoa solicitante e outro tanto por cada unha das súas irmás e dos seus irmáns con discapacidade legalmente cualificada de grao igual ou superior ao 33 por cento na convocatoria de axudas para alumnado con necesidade específica de apoio educativo.

d) 1.176 euros por cada unha das irmás e dos irmáns da persoa solicitante menor de vinte e cinco anos ou polo propio solicitante que curse estudos universitarios e resida fóra do domicilio familiar, cando sexan dous ou máis as ou os estudantes con residencia fóra do domicilio familiar por razón de estudos universitarios.

e) O 20 por cento da renda familiar nos supostos de orfandade absoluta da persoa solicitante sempre que sexa menor de vinte e cinco anos.

f) 500 euros por pertencer a persoa solicitante a unha familia monoparental definida nos termos que se establezan na correspondente convocatoria.

Artigo 11. *Outros limiares indicativos.*

1. Independentemente de cal sexa a renda familiar calculada segundo o disposto nos artigos 9 e 10, denegarase as bolsas ou axudas ao estudo solicitadas para o curso 2021/22 cando se superen os limiares indicativos de patrimonio familiar que se fixan a continuación:

a) A suma dos valores catastrais dos predios urbanos que pertencen aos membros computables da familia, excluída a vivenda habitual, non poderá superar 42.900 euros. En caso de inmobles en que a data de efecto da última revisión catastral estea comprendida entre o 1 de xaneiro de 1990 e o 31 de decembro de 2002, multiplicaranse os valores

catastrais por 0,49. No caso de que a data da mencionada revisión sexa posterior ao 31 de decembro de 2002, os valores catastrais multiplicaranse polos coeficientes seguintes:

- Por 0,43 os revisados en 2003.
- Por 0,37 os revisados en 2004.
- Por 0,30 os revisados en 2005.
- Por 0,26 os revisados en 2006.
- Por 0,25 os revisados en 2007.
- Por 0,25 os revisados en 2008.
- Por 0,26 os revisados en 2009.
- Por 0,28 os revisados en 2010.
- Por 0,30 os revisados en 2011.
- Por 0,32 os revisados en 2012.
- Por 0,34 os revisados en 2013.
- Por 0,36 os revisados entre 2014 e 2020, ambos inclusive.

Nos inmobles enclavados na Comunidade Foral de Navarra, o valor catastral multiplicarase en todo caso por 0,50.

A Dirección Xeral do Catastro facilitará por medios telemáticos a consulta da información dos municipios que correspondan a cada unha das situacións indicadas, para os efectos de aplicación do coeficiente de ponderación.

b) A suma dos valores catastrais das construcións situadas en predios rústicos, excluído o valor catastral da construción que constitúa a vivenda habitual da familia, non poderá superar os 42.900 euros, e serán aplicables ás ditas construcións os coeficientes multiplicadores, en función do ano en que se efectuase a última revisión catastral, que se establecen na letra a) anterior.

c) A suma dos valores catastrais dos predios rústicos, excluídos os valores catastrais das construcións que pertencen aos membros computables da familia, non poderá superar 13.130 euros por cada membro computable.

d) A suma de todos os rendementos netos reducidos do capital mobiliario máis o saldo neto positivo de todas as ganancias e perdas patrimoniais pertencente aos membros computables da familia non poderá superar 1.700 euros.

Non se incluírán nesta suma as subvencións recibidas para adquisición ou rehabilitación da vivenda habitual, a renda básica de emancipación nin o importe dos premios en metálico ou en especie obtidos pola participación en xogos, concursos, rifas ou combinacións aleatorias até un importe de 1.500 euros. As ganancias patrimoniais derivadas dos mencionados premios computaranse de acordo coa normativa do imposto sobre a renda das persoas físicas.

O valor destes elementos indicativos de patrimonio determinarase de conformidade co disposto na normativa aplicable do imposto sobre a renda das persoas físicas polo seu valor en 31 de decembro de 2020.

2. Cando sexan varios os elementos indicativos do patrimonio descritos no número anterior de que dispoñan os membros computables da familia, calcularase a porcentaxe de valor de cada elemento respecto do limiar correspondente. Denegarase as bolsas e axudas ao estudo solicitadas cando a suma das referidas porcentaxes supere o valor cen.

3. Tamén se denegará a bolsa ou axuda ao estudo solicitada cando se comprobe que a suma dos ingresos que se indican a continuación obtida polo conxunto dos membros computables da familia supere a cantidade de 155.500 euros:

a) Ingresos procedentes de actividades económicas en estimación directa ou en estimación obxectiva.

b) Ingresos procedentes dunha participación dos membros computables en actividades económicas desenvolvidas a través de entidades sen personalidade xurídica ou calquera outra clase de entidade xurídica, unha vez aplicada aos ingresos totais das actividades a porcentaxe de participación nestas.

4. Para os efectos do cómputo do valor dos elementos a que se refiren os números anteriores, deducirase o 50 por cento do valor daqueles que pertencen a calquera membro computable da familia, excluídos os sustentadores principais.

Disposición adicional primeira. *Medidas específicas para compensar as desvantaxes dos e das estudantes de ensinanza universitaria con discapacidade.*

1. As contías fixas das bolsas e axudas ao estudo establecidas para os e as estudantes de ensinanza universitaria, coa excepción das bolsas de matrícula, poderanse incrementar até nun 50 por cento cando a persoa solicitante presente unha discapacidade legalmente cualificada de grao igual ou superior ao 65 por cento.

Non se concederán axudas cando os gastos a que atenden estean cubertos suficientemente por servizos ou fondos públicos.

2. Cando a persoa solicitante presente unha discapacidade de grao igual ou superior ao 65 por cento legalmente cualificada, as deducións previstas nas letras b) e c) do artigo 10 para o alumnado con necesidade específica de apoio educativo aplicaranse exclusivamente á citada persoa solicitante. Ás súas irmás e aos seus irmáns seranlles de aplicación as deducións previstas con carácter xeral.

3. As convocatorias correspondentes establecerán o número de créditos de que deban quedar matriculadas e que deban superar as persoas solicitantes de bolsas e axudas ao estudo. Este número minorarase no caso de estudantes con discapacidade legalmente cualificada e reducirase a carga lectiva necesaria para cumprir o requisito de matrícula nun 50 por cento, como máximo, cando a persoa solicitante presente unha discapacidade de grao igual ou superior ao 65 por cento.

Disposición adicional segunda. *Vítimas de violencia de xénero.*

1. As mulleres que acrediten a condición de vítimas de violencia de xénero, de acordo co disposto no artigo 23 da Lei orgánica 1/2004, do 28 de decembro, de medidas de protección integral contra a violencia de xénero, desde o 30 de xuño de 2020 ao 30 de xuño de 2022, así como os seus fillos e fillas menores de vinte e tres anos e fillas e fillos menores suxeitos á súa tutela ou garda e custodia, poderán obter, no curso 2021/22, sempre que cumpran todas as demais condicións previstas na normativa vixente, a bolsa básica, ou bolsa de matrícula segundo corresponda, a contía fixa ligada á renda, a contía fixa ligada á residencia e a contía variable que resulte da aplicación da fórmula establecida no artigo 9.2 do Real decreto 1721/2007, do 21 de decembro, para o cálculo do importe da contía variable das bolsas.

2. Ás persoas a que se refire o número anterior non lles serán de aplicación os requisitos establecidos en relación coa carga lectiva superada no curso 2020/21, nin o límite do número de anos coa condición de beneficiario ou beneficiaria de bolsas, nin a exixencia de superar unha determinada porcentaxe de créditos, materias, módulos ou o seu equivalente en horas no curso 2021/22 para o cal resultasen beneficiarias da bolsa.

3. As persoas a que se refire o número 1, ademais de cumpriren os requisitos previstos nel, deberán matricularse no curso 2021/22, como mínimo, do seguinte número de créditos, horas, materias, módulos ou o seu equivalente en horas:

1.º) Estudantes de ensinanza artísticas e estudos relixiosos: 30 créditos ou o 50 por cento do curso completo no caso de ensinanza organizadas por materias.

2.º) Estudantes de grao superior de formación profesional, de artes plásticas e deseño e de ensinanza deportivas: 500 horas.

3.º) Estudantes de bacharelato, ensinanza profesional de música e danza e grao medio de formación profesional, ensinanza profesional de artes plásticas e deseño e das ensinanza deportivas: 4 materias ou o seu equivalente de 500 horas, respectivamente.

4.º) Estudantes universitarios: 30 créditos ou a metade do curso completo no caso de dotes titulacións de grao. Nestes casos, a bolsa de matrícula estenderase aos créditos en que se matriculen tanto por primeira como por segunda vez.

Disposición adicional terceira. *Prolongación dos estudos universitarios.*

Naqueles supostos en que os requisitos e as condicións aplicables permitan o desfrute de bolsas e axudas ao estudo durante un ou dous anos máis dos establecidos no plan de estudos da correspondente titulación universitaria, a convocatoria poderá establecer a contía das bolsas e axudas ao estudo que se concedan para o último destes cursos adicionais.

Disposición adicional cuarta. *Compensación ás universidades pola exención de matrícula.*

1. Durante o curso 2021/22, o Ministerio de Educación e Formación Profesional achegará ás universidades, en concepto de compensación dos prezos públicos por servizos académicos correspondentes ao estudiantado bolseiro exento do seu pagamento, unha cantidade por estudante con bolsa igual á do prezo público fixado para a titulación correspondente no curso 2021/22. No suposto de que o prezo do crédito no curso 2021/22 sexa superior ao compensado polo Ministerio no curso 2020/21 para os mesmos estudos, o Ministerio de Educación e Formación Profesional achegará ás universidades unha cantidade por estudante con bolsa igual a este último importe.

2. No caso de novas titulacións que non existisen no curso 2020/21 ou nas cales non houbera estudantes con bolsa no curso 2020/21, o Ministerio de Educación e Formación Profesional compensará as universidades co importe do prezo público fixado para a titulación correspondente no curso 2021/22. No suposto de que o prezo do crédito no curso 2021/22 sexa superior ao compensado no curso 2020/21 para titulacións co mesmo grao de contido experimental na súa comunidade autónoma, o Ministerio de Educación e Formación Profesional compensará esta última cantidade.

3. O disposto nos parágrafos anteriores será tamén de aplicación á cuantificación da compensación por parte do Ministerio de Educación e Formación Profesional da bonificación do 50 por cento das matrículas correspondentes a estudantes que pertencen a familias numerosas de tres fillos e asimiladas.

4. Exclusivamente no caso das universidades públicas, se a cantidade achegada polo Ministerio de Educación e Formación Profesional resulta inferior ao custo das bolsas de matrícula, nos termos definidos no artigo 4.1.e), a comunidade autónoma correspondente compensará as universidades públicas pola diferenza, de modo que o estudiantado beneficiario da bolsa que curse os seus estudos nun centro propio da universidade quede efectivamente exento de calquera obrigação económica.

Disposición adicional quinta. *Difusión das convocatorias.*

Os ministerios de Educación e Formación Profesional e de Universidades, en colaboración coas administracións educativas, desenvolverán accións de difusión e sensibilización para dar a coñecer as convocatorias de bolsas e axudas ao estudo obxecto deste real decreto.

Disposición transitoria primeira. *Convenios de cofinanciamento.*

Excepcionalmente para o curso 2021/22, as comunidades autónomas que iniciasen a negociación para o traspaso das funcións e servizos en materia de xestión de bolsas e axudas ao estudo personalizadas, de conformidade co previsto na disposición adicional cuarta do Real decreto 1721/2007, do 21 de decembro, poderán acordar, a través dun convenio co Ministerio de Educación e Formación Profesional, a convocatoria e o cofinanciamento, con cargo aos seus propios orzamentos, do 50 por cento das bolsas que se concedan ao estudiantado cuxa renda familiar se sitúe dentro do intervalo fixado no artigo 8, números 1 e 3.

Disposición transitoria segunda. *Renda familiar de estudantes con domicilio fiscal en Navarra.*

Para a concesión no curso académico 2021/22 das bolsas e axudas ao estudo a que se refire este real decreto, no caso de estudantes que obtivesen unha destas bolsas ou axudas ao estudo nos cursos 2016/17 ou 2017/18, para o cálculo do rendemento neto do traballo dos membros computables con domicilio fiscal na Comunidade Foral de Navarra, efectuarase a dedución no rendemento neto do traballo prevista no artigo 19.2.f) da Lei 35/2006, do 28 de novembro, do imposto sobre a renda das persoas físicas e de modificación parcial das leis dos impostos sobre sociedades, sobre a renda de non residentes e sobre o patrimonio, así como a redución por obtención de rendementos do traballo prevista no artigo 20 da citada Lei 35/2006, do 28 de novembro.

Disposición derradeira primeira. *Modificación do Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas.*

O Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas, queda modificado como segue:

Un. O título e o primeiro parágrafo do artigo 10 quedan redactados nos seguintes termos:

«Artigo 10. *Compoñentes das axudas para o alumnado con necesidade específica de apoio educativo.*

O real decreto anual a que se refire a disposición adicional primeira determinará o alumnado con necesidade específica de apoio educativo e os supostos en que poderán concederse as axudas, que conterán algún ou algúns dos compoñentes que se indican nos números 1 a 7 seguintes.

Aqueles que opten á obtención destas axudas deberán estar escolarizados nun centro específico, nunha unidade de educación especial dun centro ordinario ou nun centro ordinario que fose autorizado para escolarizar alumnas e alumnos con necesidade específica de apoio educativo.

As correspondentes convocatorias establecerán o procedemento, a documentación acreditativa e os informes que resulten necesarios en cada caso.»

Dous. Engádesse unha letra f) ao artigo 16 co seguinte teor:

«f) Pertenza a familia monoparental.»

Tres. O artigo 27.1 queda redactado nos seguintes termos:

«1. O estudantado de primeiro curso de másters que habiliten ou que sexan condición necesaria para o exercicio dunha profesión regulada deberá acreditar unha nota media de 5,00 puntos nos estudos previos que lle dan acceso ao máster. Nos restantes estudos de máster, a dita nota media será de 7,00 puntos. Para estes efectos, as notas medias procedentes de estudos de ensinanzas técnicas multiplicaranse polo coeficiente 1,17.

O estudantado de segundo curso de másters que habiliten ou sexan condición necesaria para o exercicio dunha profesión regulada deberá acreditar unha nota media de 5,00 puntos no primeiro curso. Nos restantes estudos de máster, a dita nota media será de 7,00 puntos. En ambos os casos se requirirá ter superado a totalidade dos créditos do primeiro curso.»

Disposición derradeira segunda. *Cómputo da carga lectiva superada.*

1. Estudos universitarios. Para calcular a porcentaxe de créditos superados pola persoa solicitante non se terán en conta os créditos correspondentes a materias matriculadas no curso 2020/21 de que, como consecuencia da aplicación das medidas adoptadas para a contención da pandemia da COVID-19, non puidese ser avaliada. Nestes casos, a porcentaxe de créditos superados calcularase sobre o número de créditos ou materias efectivamente avaliadas ou que puidesen ter sido avaliadas.

2. Estudos non universitarios. Para calcular o número de materias ou a porcentaxe de módulos profesionais, créditos ou o seu equivalente en horas superados no curso 2020/21, non se terán en conta os correspondentes a materias ou módulos profesionais que, como consecuencia da aplicación das medidas adoptadas para a contención da pandemia da COVID-19, fosen obxecto de autorización de aprazamento por parte da Administración competente para a súa realización no seguinte curso académico. Neste caso, a porcentaxe calcularase sobre o número de materias ou módulos profesionais efectivamente avaliados.

Disposición derradeira terceira. *Título competencial e carácter de lexislación básica.*

Este real decreto ten carácter básico e dítase ao abeiro do artigo 149.1.30.^a da Constitución española, que reserva ao Estado a competencia para ditar as normas básicas para o desenvolvemento do artigo 27 da Constitución, co fin de garantir o cumprimento das obrigacións dos poderes públicos nesta materia.

Disposición derradeira cuarta. *Desenvolvemento normativo e aplicación.*

1. Facúltanse a ministra de Educación e Formación Profesional e o ministro de Universidades para ditaren, no ámbito das súas propias competencias ou conxuntamente cando a disposición que se dite afecte ambos os ministerios, cantas disposicións sexan precisas para o desenvolvemento e execución do real decreto.

2. Os órganos competentes adoptarán as medidas necesarias para a aplicación e mellor cumprimento do disposto neste real decreto e nas súas normas de desenvolvemento e execución.

Disposición derradeira quinta. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 29 de xuño de 2021.

FELIPE R.

A vicepresidenta primeira do Goberno e ministra da Presidencia,
Relacións coas Cortes e Memoria Democrática,
CARMEN CALVO POYATO